

Fábula òf Fakto?

Mayoria hende na nos islanan ta afirmá ku Beibel ta Palabra di Dios. Ma si bo puntra nan DIKON nan ta kere esei, poko hende por kontestá. Talbes, edukashon religioso a influensia un. Otronan simpelmente ta SINTI ku Dios a inspirá e Buki aki.

E motibunan ei NO ta válido pa kere algu. Hende religioso por gañá. Sintimentu no ta konfiabel. (Si bo sinti ku San Nikolas ta bèrdat, esei no ta hasié bèrdat.) Si Beibel ta di Dios, mester tin evidensia palpabel.

Echu ta ku tin hopi evidensia irefutabel ku Beibel ta Palabra di Dios. Nos lo nota un evidensia so: arkeologia. Arkeologia ta e estudio sientifiko di bida i kultura di hende antiguo dor di deskubrí i studia artefaktonan antiguo.

Algun hende ta insistí ku Beibel ta solamente un kolekshon di fábulanan i ideanan antikuá. Si esei ta bèrdat, anto e faktonan históriko i geográfiko den Beibel lo ta kiboká. I si tin eror den Beibel, anto e Buki sagrado no ta palabranan di Dios perfekto. **Ma arkeologia ta proba ku e faktonan bíbliko ta 100% korekto.** Loke arekeologonan ta deskubrí, ketu bai ta pone kara di hende inkredulo na bèrgwensa. Nota algun ehèmpel.

Beibel ta papia hopi di rei David i su dinastia na Israel. Ma fuera di Skritura, ningun evidensia a eksistí ku David a biba. Anto na ougùstùs di 1993, un arkeólogo israeli a haña un piedra serka frontera di Siria ku e inskripshon riba dje “Kas di David”. Ekspertonan a yama e deskubrimentu “sensashonal”!

Pa hopi aña, hende a hasi cherchi di e buki di Daniel den Tèstament Bieu. Segun nan, e buki ta kontené eror históriko. Komo evidensia, nan a mostra riba e echu ku Daniel 5 ta presentá Belsasar komo e último rei di impero di Babilonia, miéntras en realidat Nabonidus tabata e último mandatario.

Ma e harimentu a para ketu ora Sir Henry Rawlinson a haña un pida klei den ruínanan di Kaldea ku nòmber di Belsasar, yu mayor di Nabonidus. Arkeologia a deskurbí ku rei Nabonidus a hasi Belsasar rei miéntras el a bai bringa na Arabia. Pues, tur dos a reina simultaneo. Belsasar tabata responsabel pa e frontera nort di Babilonia, mientras Nabonidus tabatin su kapital na Tema, na parti nort di Arabia. Belsasar a ser matá e anochi ku e stat di Babilonia a ser konkistá (nèt manera Daniel ta deskribí) i Nabonidus a ser kapturá na Borsippa.

Tur esaki ta kuadra ku Daniel 5. Belsasar a primintí esun ku por lesa i splika e skirbimentu riba muraya ku e lo bira di TRES mandatario den e reino (Daniel 5:29). E no por a hasié e di dos mandatario; ya kaba tabatin dos rei.

Sir William Ramsay tabata konvensé ku e buki di Echunan a ser skirbí despues ku e eventonan deskribí den e buki a sosodé i pues tin eror. El a biaha pa Turkia pa proba ku su teoria. Ma e arkeólogo renombrá a deskubrí ku e t'esun ku a kiboká, no Lukas, esun ku Dios a usa pa skirbi Echunan. Ramsey a skirbi: “Lukas ta un historiador di primera klase...e outor aki mester ta rekonosé entre e historiadoronan mas grandi.” Ramsey su hopi deskubrimentunan a proba ku Beibel ta bèrdat i sin eror.

Di tur e miles di artefakto ku arkeologonan a deskubrí, NI UN di nan ta kontradisí Beibel. Esaki ta importante, pasobra si arkeologonan por haña ún—1 artefakto so!—ku ta proba ku Beibel a kiboká, anto nos por sa ku Beibel ta mentira! Ma echu ta ku arkeologia ta proba ku Beibel ta inspirá pa Dios!

Hesus a bisa: “..ta mas fásil pa shelu i tera kaba, ku un tilde (un aksènt) di e Lei faya” (Lukas 16:17). Beibel ta konfiabel, sin eror. Bo por aseptá òf rechasa e echu aki, ma bo no por kambi'è!

Ta sano pa kuestioná si Beibel ta loke e ta deklará ku e ta: Palabra di Dios. Si e no ta—si e ta fábula—nos por ignor'è. Ma si e ta Palabra di Dios, anto nos mester ahustá nos bida i nos kreensia pa armonisá ku e Buki sagrado aki.